

- प्रदेश मांय नगर निकाय चुनाव रो ऐलाण-चुनाव आदर्श आचार संहिता लागू व्ही।
- 309 स्थानीय निकायां मांय 9 अर 11 सितम्बर ने वोट पड़ेला।
- 16वीं विधानसभा रो छठो सत्र काल सुरू व्हेला-सत्ता पख अर विपख रणनीति तैय कीनी।
- चिकित्सा मंत्री गजेन्द्र सिंह खींवर सरकारी अस्पतालां मांय कैंसर रा मरीजां ने मुहैया कराया जावण वाळा इंजेक्शन दिल्ली मांय कथित रूप ऊं गैर-कानूनी तौर ऊं बेच्या जावण रा मामला मांय जांच रा हुकम दीना।

000

प्रदेश रा 309 स्थानीय निकायां रा चुनाव दो दौर मांय कराया जावेला। राज्य निर्वाचन आयुक्त राजेश्वर सिंह आज जयपुर मांय खबरनवीसां ने शहरी निकाय चुनाव कार्यक्रम री जाणकारी दीनी। वे बतायो के निकाय चुनाव सदस्य ओहदा सारू अधिसूचना 27 अगस्त ने जारी करी जावेला। ई सागे ई नामपाना दाखिल करण रो काम सुरू व्हे जावेला। **एक राज्य-एक चुनाव** री सोच रा तैत कराया जा रह्या निकाय चुनाव मांय 39 जिला शामिल करी ज्या है। पहला दौर मांय 9 सितम्बर ने, जदके दूजा दौर मांय 11 सितम्बर ने वोट पड़ेला। वोटों री गिणती 14 सितम्बर ने करी जावेला। नगर परिषद सभापति अर नगरपालिका अध्यक्ष ओहदा सारू चुनाव 21 सितम्बर ने व्हेला।

राज्य रा 309 नगरीय निकायां मांय 10 नगर निगम, 47 नगर परिषद अर 252 नगर पालिकावां शामिल है। ई चुनाव मांय 1 करोड़ 44 लाख ऊं बत्ता मतदाता वोट दे सकेला। राज्य निर्वाचन आयुक्त बतायो के वोट देवण रा पात्र लोगों री तादाद जयपुर नगर निगम मांय सब ऊं बत्ती, जदके बूंदी जिला रा इंदरगढ़ मांय सब ऊं कम है।

अ चुनाव इलेक्ट्रोनिक वोटिंग मशीनां ऊं कराया जावेला। ई सारू राज्य निर्वाचन आयोग सगळा जिलां ने जरूरी तादाद मांय ई.वी.एम. अलॉट कर दीनी है। चुनाव रा काम मांय 1 लाख 15 हजार ऊं बत्ता कर्मचारियां री ड्यूटी लगायी जावेला। ध्यान जोग है के दो ऊं बत्ती संतान वाळा उम्मीदवारां रे चुनाव लड़बा माथे लगायी ज्यी रोक हटा दीरीजी है। निकाय चुनाव रा ऐलाण सागे ई संबंधित हलकां मांय चुनाव आदर्श आचार संहिता लागू व्हे गयी है।

000

राज्य री 16वीं विधानसभा रो छठो सत्र काल संवारे 11 बज्यां सुरू व्हेला। सदन रा पावस सत्र रे दौरान राजस्थान समान नागरिक संहिता बिल-2026 अर राजस्थान वृक्ष संरक्षण बिल अर वाणिज्य कर अर अन्य संशोधन बिल पेश कर्या जावण रा आसार है।

सत्र ऊं पैली विधानसभा अध्यक्ष वासुदेव देवनानी री सदारत मांय काल सगळी सियासी पार्टियां रा नेतावां री मीटिंग बुलायी ज्यी, जिण मांय सदन रा कामकाज ने ठीक-ढंग ऊं चलावण रा बारा मांय चर्चा करीजी। सरकारी मुख्य सचेतक जोगेश्वर गर्ग कह्यो के सरकार हर मुद्दा माथे चर्चा सारू तैयार है। विधानसभा रा पावस सत्र सारू सत्ता पख अर विपख आप-आप रा सदस्यां री मीटिंग बुला र रणनीति बणायी। इण ऊं पैली विधानसभा रो पांचवों सत्र ई साल 28 जनवरी ऊं 10 मार्च ताई चाल्यो हो।

000

प्रधानमंत्री नरेंद्र मोदी री सदारत मांय आज नई दिल्ली मांय व्ही केंद्रीय मंत्रिमंडल री मीटिंग मांय केई खास फैसला करी ज्या। मीटिंग पाछे केन्द्रीय मंत्री अश्विनी वैष्णव खबरनवीसां ने आं रा बारा मांय जाणकारी दीनी। वे बतायो के कैबिनेट पांच परियोजनावां ने मंजूर कीनी। आं मांय चार रेलों ऊं जुड़ी अर एक हाई-वे ऊं जुड़ी परियोजना शामिल है। श्री वैष्णव बतायो के आं परियोजनावां माथे कोई 13 हजार 41 करोड़ रुपया खर्च कर्या जावेला। वे बतायो के आं रेलवे लेणां रा काम पूरा व्हेवण पाछे आवण-जावण मांय और सुधार व्हेला।

000

प्रदेश मांय ई साल अप्रैल ऊं जुलाई महीना रे दौरान करीब 2 करोड़ 37 लाख रुपया रा निवेश प्रस्ताव मिल्या है। मुख्य सचिव वी. श्रीनिवास बतायो के डी-रेगुलेशन फेज-वन री इम्पैक्ट असेसमेंट रपट रे मुजब जुलाई महीना मांय 93 हजार करोड़ रुपया ऊं बत्ता रा निवेश प्रस्ताव मिल्या।

000

चिकित्सा मंत्री गजेन्द्र सिंह खींवर प्रदेश रा सरकारी अस्पतालां मांय कैंसर री बीमारी रा मरीजां सारू मुहैया कराया जावण वाळा इंजेक्शन री दिल्ली मांय कथित तौर ऊं गैर-कानूनी बिक्री रा मामला मांय करड़ी कार्रवाई रा हुकम दीना है। चिकित्सा मंत्री अहलकारां ने मामला री जांच करण सारू कह्यो है। वे कह्यो के सरकारी अस्पतालां मांय ईलाज सारू मुहैया करायी जा रही महंगी दवाइयां री किणी ई

लेवल माथे कालाबाजारी अर गैर—कानूनी बिक्री बर्दाश्त नी करी जावेला। बीकानेर रा सरकारी कैसर अस्पताल सारु आर.एम.एस.सी.एल. रे जरिए भेजी ज्या इंजेक्शन री दिल्ली मांय कथित तौर ऊं गैर—कानूनी बिक्री री ठा पड़्यां पाछे चिकित्सा मंत्री पूरी सप्लाई चैन, स्टॉक रजिस्टर अर दूजा रिकॉर्ड री तुरत जांच करण रा हुकम दीना है।

000

चित्तौड़गढ़ ज़िला रा बड़ी सादड़ी कने बोहेड़ा गांव मांय आज एक कार ऊं 18 किलोग्राम ऊं बत्ती अमल जूब करी ज्यी। केन्द्रीय नार्कोटिक्स ब्यूरो री ओर ऊं नशा मुक्त अभियान रा तैत करीजी ई कार्यवाही मांय पकड़ी ज्यी अफीम रो बाज़ार मांय मोल 75 लाख रुपया ऊं बत्तो मानी ज्यो है। उप नार्कोटिक्स आयुक्त नरेश बुंदेल बतायो के आ अफीम गैर—कानूनी तरीका ऊं बाड़मेर ले जाई जा रही ही।

000

सतर्कता जागरुकता सप्ताह रा तैत प्रदेश मांय भांत—भांत रा कार्यक्रम राख्या जा रह्या है। आं रे जरिए लोगां ने साइबर ठगी अर मनी म्यूल खातां रा बारा मांय जाणकारी दी जा रही है। आज पाली मांय राजस्थान ग्रामीण बैंक री ओर ऊं जाग जगावण रो कार्यक्रम राख्यी ज्यो। इण मांय बैंक रा क्षेत्रीय प्रबंधक भुवन व्यास डिजिटल लेनदेन मांय सावधानी राखण अर अणजाण जणा ने निजी जानकारी नी बतावण री राय दीनी।

000

कोटा मांय आज **राजभाषा हिंदी का महत्त्व और डिजिटल युग में उसकी संभावनाएं** मुद्दा माथे संगोष्ठी राख्यी ज्यी। कर्मचारी भविष्य निधि संगठन अर केंद्रीय संचार ब्यूरो रा क्षेत्रीय कार्यालय री ओर ऊं राख्यी ज्यी संगोष्ठी मांय असरदार हिन्दी काम लेवण ने बधावो देवण रो संकल्प करी ज्यो। संगोष्ठी मांय क्षेत्रीय आयुक्त सुधीर बत्रा कह्यो के प्रशासन मांय व्यावहारिक हिंदी काम लेवण ऊं साफगोई अर जनता सागे सम्पर्क असरदार बणे है। केन्द्रीय संचार ब्यूरो रा सहायक निदेशक रामेश्वर लाल मीणा राजभाषा हिंदी रा रूप अर डिजिटल जमाना मांय वां री बधती उपयोगिता री चर्चा कीनी। श्री मीणा कह्यो के सोशल मीडिया, ऑनलाईन शिक्षा अर ए.आई. रा दौर मांय हिन्दी, तकनीक री मज़बूत भाषा रा तौर ऊं सामी आ रही है।

000

राज्यपाल हरिभाऊ बागड़े भरतपुर रा पैरा निशानेबाज़ रुद्रांश खंडेलवाल ने अर्जुन पुरस्कार सारु चुण्या जावण परां बधाई अर शुभकामनावां दीनी है। वां रा संदेश मांय श्री बागड़े कह्यो के रुद्रांश निशानेबाज़ी मांय असाधारण खेल रो दरसाव कर र राज्य रो मान बधायो है। ध्यानजोग है के एक हादसा रे कारण पग गमावण वाळा रुद्रांश हिम्मत नी हारी अर निशानेबाज़ी ने जिन्दगी रो मकसद बना लीनो। वे शूटिंग मांय चार दफा वर्ल्ड रिकॉर्ड बनाया। वे पेरिस पैरालंपिक मांय ई देश री नुमाइंदगी कीनी। रुद्रांश साल 2023 रा एशियाई खेलां मांय ई चांदी रा दो तमगा हासिल कीनी।

000

आज वर्ल्ड फोटोग्राफी—डे है। आ दिन छायांकन कला रा इतिहास अर समाज मांय इण रा महत्त्व रो जश्न मनावण ने समर्पित है। एक अच्छी तस्वीर समय, समाज अर इतिहास रा लम्हां ने हेर र राखे है। पेश है एक रपट—

000

राखी रे मौके राज्य मांय महिलावां अर टाबरियां राजस्थान रोड़वेज री बसां मांय प्रदेश री हद मांय 28 अर 29 अगस्त ने मुफ्त सफर कर सकेला। रोड़वेज री ओर ऊं आज ई बारा मांय हुकम जारी कर दिया ज्या, हालांकि वॉल्वो बसां मांय किरायो लागेला। 27 अगस्त रात 12 बज्यां ऊं 29 अगस्त आधी रात ताई ओ सुबीतो मिलेला। ई सारु रोड़वेज री बसां मांय सीट रिजर्वेशन करायो जा सकेला। ई बीचे राज्य मांय राखी रो रंग निज़र आवण लाग्यो है। बाज़ार रंग—बिरंगी राखियां ऊं सज्योड़ा है। डाक विभाग न्यारा—न्यारा ज़िलां मांय राखियां हिफाज़त सागे पूगावण सारु वॉटर प्रूफ लिफाफां री व्यवस्था कीनी है। ई बीचे त्यौहारां ने ध्यान राखता थकां राजस्थान पुलिस ऑनलाइन ठगी अर फर्जी उपहार लिंक ऊं बचबा सारु सावचेती राखण बाबत् कह्यो है।

000

प्रधानमंत्री नरेन्द्र मोदी 30 अगस्त दीतवार ने आकाशवाणी ऊं प्रसारित कर्या जावण वाळा खास कार्यक्रम “मन की बात” मांय विचार बतावेला। आ हर महीना प्रसारित कर्या जावण वाळा ई कार्यक्रम री 137वीं कड़ी व्हेला। ई सारु आप ई 28 अगस्त ताई मुफ्त नम्बर 1800—11—7800 माथे राय भेज सको हो। नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000